

Ua Ntej Vajtswv Tsim Txhua Txhiav Yam

Ua ntej ntuj tsim teb raug yeej tsis tau muaj xyooob ntoo, toj roob hauv npes los yog tej hnuv qub li. Tsuas muaj Tswv Ntuj tib leeg xwb. Nws hais qhia rau peb, nws tsim lub ntiaj teb no li cas, nyob rau hauv nws phau ntawv Vajluskub.

Vajtswv tsim lub ntuj thiab lub ntiaj teb los ntawm nws lub fwjchim xwb, tsis yog los ntawm ib yam dab tsi li. Tiam sis lub sij hawm ntawd lub ntiaj teb no tseem tsis tau muaj ib yam dab tsis hlo li. Tos nco xwb Vajtswv hais tias *"Cia kom pom kev!"* ces nws cia li pom kev tuaj. Koj puas paub hais tias Vajtswv muaj fwjchim kawg nkaus thiab nws siv nws tej fwjchim uas yog nws cov lus los tsim txhua yam tsav nyob rau saum ntuj thiab hauv lub ntiaj teb no.

Vajtswv tsim txhua yam nyob hauv 6 hnuv. Vajtswv cov lus nyob hauv nws phau ntawv Vajluskub, teev tseg qhia hais txog 6 hnuv ua Vajtswv tsim lub ntuj thiab lub ntiaj teb no thaum peb nyeem. *"Nws thiaj yog hno ntuj, nws thiaj yog nruab hnuv--Uas yog hnuv Ib."* Nws hais ib yam li ntawd nyob rau hnuv ob, hnuv peb, mus txog hnuv rau (6). Txhua txhua hnuv Vajtswv hais tias, *"Cia li txawm"* thiab ntawm nws tej lus uas muaj kuab uas nws tau hais tias cia kom--pom kev, muaj ntuj, muaj av, muaj dej hiav txwv thiab dej ntws, muaj nroj tsuag thiab xyooob ntoo, muaj hnuv, muaj hli, muaj hnuv qub, muaj ntsees, muaj tsiaj txhu, thiab muaj tsiaj nruab nrag. Txhua txhua yam ua hais los saum no, Vajtswv tsim ua ntu zus los tau zoo raws li nws siab xav.

Tiam sis, yam muaj nuj nqis tshaj tej tsiaj txhu uas nws tsim rau peb pom yog nyob rau hnuv 6. Nws yog tus txiv neej thiab tus poj niam. Tos tus txiv neej thiab tus poj niam muaj nuj nqis dua txhua yam txiaj los yog vim hais tias **Adas**, yog thawj tug txiv neej, uas Vajtswv muab cov hmoov av nyob hauv av puab tawm los zoo li nws tus yam ntxwv. Hos **Evas** ces, Vajtswv muab Adas ib tug tav coj los puab ua xwb. Yog li no, nkawv ob leeg thiaj li yog ob tug uas muaj nuj nqis thiab zoo tshaj txhua yam tsiaj.

Txiv neej yog tus uas muaj nuj nqis tshaj vim hais tias nws tsim los ntawm Vajtswv tus yam ntxwv. Qhov no tsis tau hais tias txiv neej txawm yuav zoo li Vajtswv. Tib neeg yuav zoo tsis thooj li Vajtswv vim hais tias Vajtswv yog tus ntsuj plig. Vajtswv tsis muaj cev nqaij daim tawv li tib neeg muaj. Tsim los ntawm Vajtswv tus yam txwv txais tau hais tias neeg nyob thaum chivkeeb yog ib co dawb huv zoo li Vajtswv, tsis muaj kev txhaum thiab muai tswv vim zoo li Vajtswv. Ohov tseeb

mas thaum Vajtswv tsim txhua yam tsav tag nws tau hais tias "zoo heev."

Ntxiv mus hais txog tus txiv neej lub cev, Vajtswv tseem muab ntsuj plig thiab txoj sia rau tus txiv neej thiab tus poj niam. Tsuas yog peb tib neeg xwb uas Vajtswv thiaj li muab cev nqaij daim tawv, txoj sia thiab ntsuj plig pub. Yeej tsis muaj ib yam tsiaj dab tsi uas muaj ntsuj plig li peb tib neeg.

Tsis tas li qhov uas Vajtswv tsim tib neeg tau zoo thiab los ntawm nws tus yam ntxwv, Vajtswv tseem muab txoj cai rau tib neeg kom tib neeg los saib thiab kav tag nrho tej tsiaj txhu ua nyob rau hauv lub ntiaj teb no. Qhov no yog ib qho hauj lwm hnyav kawg rau tib neeg. Tiam sis niaj hnub no, yeeb vim yog tib neeg tau muaj kev txhaum ntau, tib neeg thiaj li tsis saib xyuas tej uas Vajtswv tsim kom zoo raws li nws xav tau. Peb tau ua phem rau lub ntiaj teb zoo nkauj uas Vajtswv tau tsim los. Peb tau hlawv tej nroj ua pa taws dub ncho mus rau tej haub cua, peb tau hliv tej dej tsis zoo mus rau tej dej ntws, peb tau pov tej khib nyiab rau peb tej zej zog thiab toj roob hauv pes, peb tau tua tej tsiaj txhu nyob nruab nrag tas thiab ntov tej xyoob ntoo pov tseg tab sis twb tsis pab cog ib tsoob rov qab li.

Peb tsis pab tu Vajtswv tej khoom kom tsim nyog li peb paub tu. Peb lub ntiaj teb no tsis zoo nkauj li thaum Vajtswv tsim lawm. Ib yam li peb tsis txuag thiab tu peb lub cev. Peb tsis fwm peb cev daij daim tawv thaum peb noj, haus dej caw, thiab haus luam yeeb. Peb ua peb lub cev puas tsuaj thaum peb haus yeeb haus tshuaj. Peb tsis yog cov neeg dawb huv li thaum Vajtswv tsim lawm.

Peb yuav tsum tsis txhob rhuav peb lub cev thiab lub ntiaj teb kom puas tsuaj, tiam sis yuav tau ua Vajtswv tsaug. Peb yuav tsum ua Vajtswv tsaug rau qhov nws pub kev noj qab nyob zoo rau peb thiab nws tseem tsim tau peb kom paub ntshai nws thiab tsim tau peb txhua tus zoo nkauj zoo nraug. Tsis muaj ib yam dab tsi txawj xav li peb xav, tsis txawj siv tes taw li peb siv, thiab tsis muaj ntsuj plig li peb.

Ntsuj plig yog ib yam khoom zoo uas Vajtswv muab pub rau peb. Los ntawm txoj kev ntseeg tus Tswv Yexus Khetos, Vajtswv leej tub, hais tias muaj ib hnub peb tus ntsuj plig yuav rov qab mus nrog tus Tswv uas yog tus muab ntsuj plig pub rau peb. Hnub ntawd peb mam li tsa suab qhuas tus Tswv hais tias, "*Aub ua tsaug rau tus Tswv vim nws yog tus zoo!*"

**KAWM MUS NTXIV, NYEEM PHAU NTAWV
CHIVKEEB TSHOOJ IB THIAB OB HAUV KOJ PHAU
VAJLUSKUB.**